



SA EXAM PAPERS

YOUR LEADING PAST YEAR EXAM PAPER
PORTAL

Visit SA Exam Papers

www.saexampapers.co.za



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LESIBILI (P2)

INDLOVANA/INDLOVULENKHULU 2016

EMAMAKI: 70

SIKHATSI: Ema-awa 2

Leliphepha linemakhasi la-19.

TICONDZISO

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze kulomnyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.
3. Leliphepha lemibuto licuketse TIGABA LETINE

| | |
|------------------------------|------|
| SIGABA A: Inoveli | (35) |
| SIGABA B: Umdlalo | (35) |
| SIGABA C: Tinzaba letimfisha | (35) |
| SIGABA D: Tinkondlo | (35) |
4. Phendvula imibuto LEMIBILI kuphela. MUNYE umbuto kusinye setigaba letimbili.

SIGABA A: INOVELI
Phendvula MUNYE umbuto wenoveli loyifundzile.

SIGABA B: UMDLALO
Phendvula MUNYE umbuto wemdlalo lowufundzile.

SIGABA C: TINDZABA LETIMFISHA
Phendvula YOMIBILI imibuto lebutwe ngetinzaba letimfisha.

SIGABA D: TINKONDLO
Phendvula TOTIMBILI tinkondlo lekubutwe ngato.
5. Sebentisa luhlu lwekutikhumbuta kute usitakale.
6. Landzela ticondziso letisekucaleni kwaleso NALESO SIGABA.
7. Tinombolo tetimphendvulo atihambisane naleto temibuto njengobe tinjalo ephepheni lemibuto.
8. Cala LESO NALESO sigaba ekhasini LELISHA.
9. Siphakamiso sekulawulwa kwesikhatsi singaba ngemaminithi la-60 kuleso naleso sigaba.
10. Bhala ngesandla lesibonakalako nalesifundzekako.

LUHLA LWEKUTIKHUMBUTA

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

| SIGABA A: INOVELI | | |
|--|----------------|----------------|
| Phendvula umbuto wenoveli loyifundzile. | | |
| INOMBOLO YEMBUTO | EMAMAKI | LIKHASI |
| 1. <i>Kwasha Tikhotsa</i> | 35 | 5 |
| SIGABA B: UMDLALO | | |
| Phendvula umbuto wemdlalo lowufundzile. | | |
| 2. <i>Lahloma Ladvuma</i> | 35 | 8 |
| SIGABA C: TINDZABA LETIMFISHA | | |
| Phendvula YOMIBILI imibuto lebutwe ngetinzaba letimfisha. | | |
| 3.1 'Kuhle Ketfu!' | 18 | 11 |
| 3.2 'Ligundvwane Esikhwameni' | 17 | 13 |
| SIGABA D: TINKONDLO | | |
| Phendvula TOTIMBILI tinkondlo lokubutwe ngato. | | |
| 4.1 'Kuhle Ketfu!' | 17 | 15 |
| 4.2 'Mnukubeti Wemvelo' | 18 | 17 |

LUHLA LWEKUTIKHUMBUTA

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

| SIGABA | TINOMBOLO TEMIBUTO | LINANI LEMIBUTO LEPHENDVULWAKO | THIKA (✓) |
|---|-------------------------------|---|----------------------|
| A: Inoveli (Imibuto lemifisha) | 1 | 1 | |
| B: Umdlalo (Imibuto lemifisha) | 1 | 1 | |
| C: Tindzaba letimfisha (Imibuto lemifisha) | 2 | 2 | |
| D: Tinkondlo (Imibuto lemifisha) | 2 | 2 | |
| CAPHELA: Cikelela kutsi uphendvule imibuto lesetigabeni LETIMBILI kuphela. | | | |

SIGABA A: INOVELI**UMBUTO 1: KWASHA TIKHOTSA – LL Dlamini**

Fundza lethekesthi bese uphendvula imibuto letawulandzela.

'Live lababe kwehlukaniselwane ngalo etindzaweni letinyenti. Labo bantfu abakakhonti, kepha batisikele nje ngaphandle kwemvumo yami. Loko labakwentako kwedzelela mine', kusho Mswati akhombisa kukhatsateka ngendlela lemangalisako.

'Simo sibi ngaleyo ndlela Ngwenyama?' Kubuta Mbovane akhombisa kumangala kakhulu. Kunjalo ndvuna yami. Simo sibi kakhulu. Siphocetekile kutsi sitsatse tikhali silwe. Kugoca tandla angeke kuisite ngalutfo', kusho Mswati.

Watsi abeve lawo mavi Mbovane, wakhala tinyembeti tehla mihli njengemfati. Sashuba simo setingcoco elawini leNkhosi. Sandlane abebuke phasi kubonakala kutsi uphatseke kabi. Ingwenyama beyitsi nayitsi iyakhuluma lulwimi lugcwale umlomo. Ekugcineni akekho lowaphumelela kuphuma nelivi lelivakalako. Mswati, Sandlane naMbovane bewungatsi bafelwe bazilile ngenca yesimo lebebakuso.

'Emachibini emigcinga, edvutane nesicalo semfula Ligwa kwakhe imindeni leminyenti yeBesutfu. Etingonini temfula Silobela kwakhe imindeni yeBesutfu. Ngasemfuleni Sosiphutwane, etintsabeni teMhlokombili kwakhe Besutfu. EMkhingoma neNtsababovu kwakhe Besutfu. IMhluzi neLubhalule imifula legcogcele ndzawonye imindeni yeBesutfu. Indubazi enhla nelive inatfwa ngiso lesive,' kukhuluma Mswati akhombisa kuphatseka kabi. Wachubeka watsi, 'Mbovane! Mbovane! Ngifuna kuliwe naso lesive sitfunjwe sibe ngaphasi kweMaswati. Intfo leletse imindeni leminyenti lapha kufuna emadlelo emfuyo nekubalekela kucindzeteleka etindzaweni lekuchanyukwa kuto. Lokucasulako kutsi labantfu abakakhonti lapha, kepha bafike bakha ngaphandle kwekwenta ticelo letifanele.'

[Likhasi 34–35]

1.1 Ubaluleke ngani Mswati esiveni seMaswati?

Khetsa YINYE imphendvulo.

- A Ungumkhweteli
- B Ulichawe
- C Uyimbangi
- D Ungumcabanisi

(1)

1.2 Nguyiphi indzima ledlalwa nguKhubalo kulenoveli?

Khetsa YINYE imphendvulo.

- A Kwelapha inkhosi.
- B Kweluleka inkhosi.
- C Kuphekela inkhosi.
- D Kugada inkhosi.

(1)

1.3 Yini lebangela Mbovane akhale tinyembeti kuletheksthi lengenhla?

Khetsa YINYE imphendvulo.

- A Ukhaliswa kutsi kumele afakaze.
- B Ukhaliswa kutsi kumele abulawe.
- C Ukhaliswa kutsi kumele akhulume.
- D Ukhaliswa kutsi kumele kuyoliwa. (1)

1.4 Kungani kufa kwaMtjekeni kumphatse kabi Somcuba? (1)

1.5 Lamagama lasenkhumeleni yaMswati latsi, 'lulwimi lugcwale umlomo', amveta angumuntfu lonjani kuletheksthi lengenhla? (1)

1.6 Ngaphandle kwekuyohlasela yini labengayenta Mswati kutsi ancobe titsa takhe? (1)

1.7 Condzanisa netimphendvulo letikuKHOLOMU B emagama lakuKHOLOMU A.

| IKHOLOMU A | IKHOLOMU B |
|-------------------|------------------------|
| 1.7.1 Somcuba | A Inceku yenkhosi. |
| 1.7.2 Sidwala | B Umholi wemigadlela. |
| 1.7.3 Khambi | C Waphupha uyise. |
| 1.7.4 Tikhuba | D Sigodlo senkhosi. |
| 1.7.5 Eludzidzini | E Wabaleka netinkhomo. |

(5 x 1) (5)

1.8 Bhala tindzawo LETINTSATFU lapho bekwakhe imindeni yeBesutfu kuletheksthi lengenhla. (3)

1.9 Bhala KUBILI lobekukhatsata Mswati kuletheksthi lengenhla. (2)

1.10 Ucabanga kutsi yini lebeyibangela letingcogco letisemkhatsini waMswati netindvuna takhe tikhulunyelwe elawini? Bhala KUBILI. (2)

1.11 Bobani balingisi lababili lebebahamba embili ekusombululeni tinkinga labukene nato Mswati kuletheksthi lengenhla? (2)

1.12 Bhala KUBILI lokufakazela kutsi ingcikitsi yalenoveli ngumbango webukhosi. (2)

1.13 Yini lebeyibanga kutsi Mswati aphake imphi aphindze abe ngulomunye webaholi bayo kulenoveli? (2)

1.14 **Kuliciniso** nobe **kuliphutsa** yini kutsi lenoveli beyingeke yachubeka ngaphandle kwaSomcuba? Sekela imphendvulo yakho ngemaphuzu LAMABILI. (2)

- 1.15 Bhala tizafu LETIMBILI letenta kutsi Mswati abe nemandla langaka ekulweni nekuncoba tive? (2)
- 1.16 Nasifundza endzabeni yonkhe lutfolakalaphi luvutfondzaba? (2)
- 1.17 Mlayeto muni lotfolwa ngulabafundza lenoveli? (2)
- 1.18 Ngabe bafundzi balenzaba bebasilindzele yini siphetho sayo? Sekela ngemaphuzu LAMATSATFU. (3)

SAMBA SESIGABA A: 35

NOBE

SIGABA B: UMDLALO**UMBUTO 2: LAHLOMA LADVUMA – Z Motsa**

Fundza lethekesthi bese uphendvula imibuto letawulandzela.

| | |
|-------------|--|
| NDVUKU: | <i>(Utfukutsele sewuyaveva)</i> He-he-e mfana! Utawufisa kutsi ngabe uwamite angakaphumi lawo mavi! Angiva-ke? Longatsi ungetfuka ngamake nje? <i>(Acuphe tindvuku takhe.)</i> Tsatsa takho-ke uvike sibone kutsi ingatsi lengelula iwushaya kanjani umzaca. Vika! Sewuyihlohle emgodzini wayo nyalo! <i>(Atitsatse Vusa. Bavikisane.)</i> <i>(Kungakabiphi kuvakale, 'phahla!')</i> |
| KHETSIWE: | Hawu! Ndvukutemphi! Walubulala ludziwo lwami! |
| NDVUKU: | Seluphelile yini lubumba? <i>(Anganaki, achubeke avikisane nemnakabo.)</i> |
| KHETSIWE: | Ndvukutemphi! Ngulolu ... ngulolu lengalunikwa yindlovukati nayingemukela nyakenye! Ndvukutemphi sewulwephulile! |
| NDVUKU: | <i>(Sewetfukile)</i> Ngulolo kantsi? Pho bewungasho ngani? Nawe Khetsiwe uluphetse dlakadlaka bo! Nyalo buka se ... |
| VUSEMATFWA: | Mine ngifuna kudla kwami la! |
| NDVUKU: | Asebamuve lo! Ungakhalela tjwala ubona sesehlelewe yinhlekelele? <i>(Abhekise kuKhetsiwe)</i> Khetsiwe yenta taba bo! Wetame kutfola lolunye khona lamuhla nje. |
| KHETSIWE: | Lolunye? Lamuhla? |
| NDVUKU: | Yebo. Ngete ngalala nesinyama lesinjena. Yetamani bo! |
| KHETSIWE: | Ngenteni nje Ndvukutemphi nawe uyati kutsi ... <i>(Kukhuleke umuntfu emnyango.)</i> |

[Likhasi 14–15]

2.1 Ngumuphi umlingisi lomkhulu kulomdlalo?

Khetsa YINYE imphendvulo.

- A Vusematfwa
- B Tfolwako
- C IMbiba-nchanti
- D Tsembative

(1)

2.2 Kwabangelwa yini kutsi Ndvukutemphi atsi angeke akhone kulala nesinyama kulethekesthi lengenhla?

(1)

- 2.3 Kusho kutsini kutsi,
'Sewuyihlohle emgodzini wayo nyalo!' nawufundzisisa lethekesthi lengenhla?

Khetsa YINYE imphendvulo.

- A Ungihambise kakhulu.
B Ungijabulise kakhulu.
C Ungitfukutselise kakhulu.
D Ungikhohlise kakhulu. (1)

- 2.4 Ngabe Qedizizwe wagcina ngani kulomdlalo?

Khetsa YINYE imphendvulo.

- A Washaywa
B Wabaleka
C Waboshwa
D Wafa (1)

- 2.5 Ngubuphi butsakatsaka baVusematfwa lobuvelwe kulethekesthi lengenhla?

Khetsa imphendvulo yakho.

- A Utsandza kulwa.
B Utsandza tjwala.
C Utsandza tintfombi.
D Utsandza kudla. (1)

- 2.6 Condzanisa netimphendvulo letikuKHOLOMU B emagama lakuKHOLOMU A.

| KHOLOMU A | KHOLOMU B |
|--------------------|---------------------------|
| 2.6.1 Ndvukutemphi | A Umgcinisango |
| 2.6.2 Tsembative | B Wabulala ludziwo. |
| 2.6.3 Galela | C Ngumsa weMbiba-nchanti. |

(3 x 1) (3)

- 2.7 Kusho kutsini kutsi Khetsiwe loludziwo abeluphetse 'dlakadlaka' kulethekesthi lengenhla? (1)

- 2.8 Wenta kahle yini Khetsiwe kutsi ahambe naTsembative? Sekela imphendvulo yakho. (2)

- 2.9 Bhala umbono wakho ngekuphikwa kwaMadzandza aphikwa nguNdvukutemphi. (2)

- 2.10 Yini lebangwa nguVusematfwa naNdvukutemphi kulomdlalo? Bhala KUBILI. (2)

- 2.11 Yini leyenta kutsi lethekesthi lengenhla idlaleke esiteji? Bhala KUBILI. (2)
- 2.12 Ndvukutemphi uvakala angumuntfu lotfukutsele kakhulu kulethekesthi lengenhla. Caphuna emavi lawakhulumile lafakazela loko. (1)
- 2.13 Yini kutsiwe Khetsiwe limfanele libito lakhe? Bhala sizatfu saloko. (2)
- 2.14 Belutawubonakala kanjani loludziwo kutsi Khetsiwe ulubumbe kabusha? (2)
- 2.15 Bhala sento lesibi lesentiwa nguMadzandza kulomdlalo. (2)
- 2.16 Bhala kutsi Tsembative ubaluleke ngani kulomdlalo. (2)
- 2.17 Ucabanga kutsi kuphuka kweludziwo kwamsita ngani Vusematfwa? (2)
- 2.18 Utsini umbono wakho ngekutfolakala kweMbiba-nchanti ihleli esigicini esiphetfweni salomdlalo? (2)
- 2.19 Lokubekwa kwenkhosi kwenteka kuyiphi indzawo, yini ndzaba? (2)
- 2.20 Boniwa yini budlelwane emkhatsini waQedizizwe naNdvukutemphi? Bhala emaphuzu LAMATSATFU. (3)

SAMBA SESIGABA B: 35

NOBE

SIGABA C: TINDZABA LETIMFISHA**UMBUTO 3: LITSAMBO – EJ Mhlanga**

Phendvula YOMIBILI imibuto lebutwe ngetindzaba letimfisha.

3.1 'KUHLE KETFU!' – AD Mnisi

Fundza lethekesthi lengentasi bese uphendvula imibuto letawulandzela.

'Hawu! Kantsi nawe ufikile kulomshado? Uyati kube nasekufeni kunje!' Kusho Mahlindza atsi kumamatseka kancane. 'Yebo Mtfombeni ngimi lona kepha ngita nendzaba lebuhlungu. Ngicela kutsi uwumise lomshado ngobe phela loCynthia loshadako, ngulomntwana lowangala ngitetfwele yena. Cha Magagula misa lomshado lihlazo phela leli!'

'Hawu! Kantsi ngebantfwabami bobabili? Kodvwa Lomavundvo wena wase umuphelani sibongo lesingasiso sakhe lomntwana?' 'Akusingimi. Angitsi nawe wangishiya phasi kabuhlungu. Akusingimi kepha betenhlalakahle. Nalelikheli lengalibhalisa kutsi ngihlala khona ngasengiyasuka ngacoshwa lutfufuva ngayohlala emkhukhwini.' Yasho yacala ingoma yesitebhu. Wangena makoti nemnakabo angasimuhle nakadzeni. Bangena nje bashaya kancane. Wangena makoti kwalilitela talukati. Basho batsi, 'yangu, intfombi lemhlophe.' Wasukuma Mahlindza wafike wema embikwabo waphakamisa tandla. Watsi ufuna kukhuluma, livi langaphumi wacina nje ngako kutsi asale akhamisile aphakamise tandla. 'Lilili kuhle ketfu! Kahle mkhulu konisa, ungabi nemona ngobe wena awuzange ushade!' Kusho livi lelivila esicukwini sebantfu.

[Likhasi 20–21]

3.1.1 Bhala ligama leliso 'lutfufuva'.

Khetsa YINYE imphendvulo.

- A Lutfuli
- B Tibhelu
- C Umvangedvwa
- D Inkhumbulo

(1)

3.1.2 Ngabe singenisiso salendzatjana siyaheha yini?

Khetsa YINYE imphendvulo.

- A Siyaheha ngobe sicala ngekujabula.
- B Siyaheha ngobe sicala ngenkhulumiswano.
- C Siyaheha ngobe sicala ngekucabana.
- D Siyaheha ngobe sicala ngekungabata.

(1)

- 3.1.3 Condzanisa emagama lakuKHOLOMU A netimphendvulo letikuKHOLOMU B.

| IKHOLOMU A | IKHOLOMU B |
|-------------------|----------------------------------|
| (a) Peter | A Singani saMahlindza sakudzala. |
| (b) Lomavundvo | B Umshadikati |
| (c) Mahlindza | C Ngumntfwana waMahlindza. |
| (d) Cynthia | D Likhehla lelamisa umshado. |

(4 x 1) (4)

- 3.1.4 Yini leyamangalisa Mahlindza nakefika emshadweni wendvodzana yakhe? (2)
- 3.1.5 Bhala KUBILI labengasitwa ngako Cynthia emuva kwalesehlakalo sekumiswa kwemshado. (2)
- 3.1.6 Chaza kutsi yini leyabangela mkhulu Mahlindza amise umshado? (2)
- 3.1.7 Kube wena bewunguPeter bewungehlukana yini naCynthia emuva kwalesehlakalo? Sekela imphendvulo yakho. (2)
- 3.1.8 Bhala KUBILI lokwabanga kutsi Lomavundvo aphe Cynthia sibongo lesingasiso sakhe nawufundza lethekesthi lengenhla. (2)
- 3.1.9 Lesihloko salenzaba lemfisha lesitsi 'Kuhle Ketfu!' siyahambisana yini nalenzatjana? Sekela imphendvulo yakho. (2)

3.2 'LIGUNDVWANE ESIKHWAMENI' – JJ Ncongwane

Fundza lethekesthi lengentasi bese uphendvula imibuto letawulandzela.

Kwatsi sengicedzile ngashona ekamelweni sengiyotsatsa sipashi sami ngobe sikhatsi sami sekuya emsebentini besesondzele. Ngatsi ngingena ekamelweni ngeva tswitswi ... tswitswi ... tswitswi. Hhayi ngetfuke kangaka.

'Hha! Nemambala Sifiso ushito, nalo ligudwane likhala bo! Likhaphi leligudwane? Abaloyi, yenabakitsi! Longatsi vele likhala lapha esikhwameni sewashini. Kepha lingene njani? Kuphi? Nini? Lesikhwama asinayo imbobo mosi. Timphahla tifakwe nezibhu ivalwe ngimi. Ngikhuluma nje ngimile ngibuka lesikhwama ngetfukile, ngesaba nekusondzela edvute. Ngaleso sikhatsi Sifiso umele lapha emnyango nje umntfwanami uhlahle emehlo angaka. Pho utsi unawo yini umntfwanami emehlo ngobe timbokodvo nje. Makhulu afute lawa eyise, Ndlondlo'.

'Ehhena make! Iyana, nikutjeyiye natsi shilwane shingenile esikhwameni shakho,' kusho Sifiso aze adlalise umuno.

'Yehheni! Labatsakatsi balapha eTjakastad ngabe sebacalile bangibangisani, lendlu yami yaseWitbank? Phela vele bayasho labantfu balapha eTjakastad kutsi bayaganga. Yehheni ngitakwenta njani manje?'

Lwangishaya lwangicoba luvalo. Yintfo lengitayitsini manje le ngobe ngingedvwa futsi ngisaya esikolweni? Ngihambe ngiye emsebentini ngishiye leligudwane lemalumbo lapha esikhwameni? Hhayi, kuncono ngingasayi emsebentini kepha angiphutfume lapha ngesheya kuKhekhekhe inyanga lenkhulu. Ngisacabanga loko, laphindza futsi lakhala leligudwane lapha esikhwameni. Lakhala ngaze ngabona sikhwama sichachatela kancane kulelinye lemakhona aso. Loko bekusho kona kutsi leligudwane lihleti kulelo khona. Cha, angingaphuti, angivele ngicondze lapha kuKhekhekhe. Phela ngemaloyo lawa.

[Likhasi 83]

3.2.1 Yini inkinga yalomake lekukhulunywa ngaye kulethekesthi lengenhla? (1)

3.2.2 Yini lena lebeyikhala esikhwameni?

Khetsa YINYE imphendvulo.

- A Ligudwane
- B Lintjwele
- C Likati
- D Ngumakhalekhikhini

(1)

- 3.2.3 Lenzatjana lengenhla yenteka kuyiphi indzawo?
Khetsa YINYE imphendvulo.
A eTjakastad
B eWitbank
C eDundonald
D eMariti (1)
- 3.2.4 Caphuna inkhulumo lefakazela kutsi LaTfwala abekholelwa ekutsakatfweni. (2)
- 3.2.5 Kuliciniso nobe ngumbono kutsi Sifiso usifakile sandla ekutseni make wakhe aye kuKhekhekhe? (2)
- 3.2.6 Ngabe Khekhekhe wamsita yini LaTfwala kulenkinga lebekabukene nayo? (2)
- 3.2.7 Bhala KUBILI lokwenta kutsi LaTfwala atsi leligundwane lemalumbo. (2)
- 3.2.8 Ngekubona kwakho kuyingoti ngani loku lokwentiwe nguNdlondlo kumkakhe? Bhala KUBILI. (2)
- 3.2.9 Yini kutsiwe Sifiso limfanele libito lakhe? Bhala sizatfu saloko. (2)
- 3.2.10 Wena ngekubona kwakho bekafanele yini LaTfwala kutsi aye enyangeni ngaloku lokukhala esikhwameni? Sekela imphendvulo yakho. (2)

SAMBA SESIGABA C: 35

NOBE

SIGABA D: TINKONDLO**UMBUTO 4: LETFWESE – PT Jele, JJ Thwala**

Phendvula TOTIMBILI tinkondlo lekubutwe ngato.

4.1 Fundza lenkondlo lelandzelako bese uphendvula imibuto letawulandzela.

Kuhle Ketfu! – OA Bhiya

- 1 Kusemtsimbeni lomangalisako,
- 2 Kusemgidvweni lowesabekako;
- 3 Bapheleketeli bamakoti banyukubele,
- 4 Buso betibukeli buncumile;
- 5 Bahlabelela kungatsi bakhatsese,
- 6 Makoti ucambalele tawi!

- 7 Lomshad' uyamangalisa!
- 8 Umlobokati wembets' iveyiii yelipulango,
- 9 Umyeni wembetse letimnyama,
- 10 Bahlabeleli bambetse inyunifomu lemnyama;
- 11 Buso babo buphaphatsekile,
- 12 Imphefumulo yab' ikhatsatekile.

- 13 Talukat' atililiteli;
- 14 Emajah' awaphoseki,
- 15 Tintfomb' atigidz' indlamu,
- 16 Bantswana bamel' ekudzeni,
- 17 Bamunya tiffuph' emlonyeni,
- 18 Kungabe bayawulala badleni?
- 19 Iwil' insika yelikhaya.

- 20 Sicumbi setivakashi siyashuca,
- 21 Libandla lebafundisi liyahuba;
- 22 Bayolim' ensimini lengafulwa.
- 23 Likhaba lalensimu liyabola;
- 24 Likhaba lalensimu alibonwa.

- 25 Umbhishobh' ubusis' umlobokati,
- 26 Umbhishobh' ubhek' emculwini;
- 27 'Lutful' elutfulin' umphefumulo kuMnikati'
- 28 Liyakhemetel' etibukelini,

- 29 Iyan' imvula yetinsizi;
- 30 Umtsimba wonkh' uhlukeme,
- 31 Umlobokati usele weneme.

[Likhasi 45–46]

- 4.1.1 Yini leyakhiwa ngulomugca longentasi ngalemisindvo ledvvetjelwe?
'Bapheleketeli bamakoti banyukubele'
Khetsa YINYE imphendvulo.
A Sifanangwaca
B Sifanankhamisa
C Silinganisamcondvo
D Sifutamsindvo (1)
- 4.1.2 Bhala luhlobo lwemvumelwano kulomusho lolandzelako.
'Bantfwana bamel' ekudzeni,
Bamunya titfuph' emlonyeni'
Khetsa YINYE imphendvulo.
A Imvumelwanosigcino
B Imvumelwanosicalo
C Imvumelwanomkhatsini
D Imvumelwanomaphakatsi (1)
- 4.1.3 Akhani lamagama ladvvetjelwe kulemigca lelandzelako?
Likhaba lalensimu liyabola
Likhaba lalensimu alibonwa
Khetsa YINYE imphendvulo.
A Luchumanosicalo
B Luchumanosigcino
C Luchumanosiphambano
D Luchumanomkhatsini (1)
- 4.1.4 Bhala imigca LEMIBILI letfolakala endzimeni ye-5 lefakazela kutsi lenkondlo isho kutsi kusemngcwabeni kuyangcwatjwa? (2)
- 4.1.5 Bhala KUNYE lokungenisa imali eNingizimu Afrika lokwentiwa ngelipulango. (1)
- 4.1.6 Ufanisani sonkondlo emugceni 29? Usho ngani? (2)
- 4.1.7 Kushoni kutsi 'tfwi'? Chaza. (2)
- 4.1.8 Bhala KUTSATFU lokusenzimeni ye-3 lokumele kwentiwe bantfu emshadweni, lokungenteki kulenkondlo lengenhla. (3)
- 4.1.9 Bhala tindzawo letinebantfu labanyenti lavame kutivakashela sonkondlo nawufundzisisa lenkondlo lengenhla. (2)
- 4.1.10 Bhala bantfu labavela buhlungu sonkondlo nekutsi yini abavele buhlungu, ubhekise kulenkondlo lengenhla. (2)

4.2 Fundza lenkondlo lengentasi bese uphendvula imibuto letawulandzela.

Mnukubeti Wemvelo – AT Fakudze

- 1 Utsini ngalomoya lowunukubeta nsuku tonkhe?
- 2 Utsini ngalamanti lowakhipha sitfunti?
- 3 Utsini ngalomhlaba lowuwukhipha buwona?
- 4 Utsini ngalolwandle loluncisha inhlonipho?
- 5 Vele sonkhe sesihlukubetekile,
- 6 Vele sonkhe sesihluphekile,
- 7 Sekwanele Mhlukubeti ndzini.
- 8 Salusukhawula ngekushesha.

- 9 Kutsanti bekwekhutwa wen' eMgwenya
- 10 Itolo bekwelulekwa wen' evenini yakho yentfutfu.
- 11 Namuhla kusahhunyutwa wena ngemfuhlumfuhlu yetibi takho
- 12 Tehle letingeyusulwa ngumuntfu,
- 13 Akhale Noyana,
- 14 Tikukhalele takaSigonyela.

- 15 Emabhodlela, emabhodlela emigwacweni yetfu
- 16 Asihlaba sihlabeke enyameni yetfu
- 17 Emaphepha, emaphepha emabaleni etfu
- 18 Aphephuka sihlabeke etindleleni tetfu
- 19 Tincamu, tincamu etindleleni tetfu
- 20 Tincamul' imphilo yetfu eveni ngekushesha
- 21 Kantsi yini ngawe Mnukubeti?
- 22 Kantsi kwakhala nyonini kuwe?
- 23 Kantsi wabhunyelwa ngatiphi wena?
- 24 Usilwane cobo lwaso wena
- 25 Sekwanele Mnumzane- COLA.
- 26 Mnukubeti, Mnukubeti,
- 27 Cabanga, ucabangisise,
- 28 Zindla uzindlisisa
- 29 Tinsuku takho setibaliwe,
- 30 Sala kutjelwa sibona ngemopho.

[Likhasi 37]

4.2.1 Kusho kutsini kutsi, 'Tikukhalele takaSigonyela'?

Khetsa YINYE imphendvulo.

- A Kuboshwa ngemaphoyisa.
- B Kuboshwa bantfu.
- C Kuboshwa belumbi.
- D Kuboshwa tigebengu.

(1)

- 4.2.2 Khokha ligama lelisetjentiswe enkondlweni lengenhla sonkondlo labita ngalo umuntfu lacondzise kuye lenkondlo. (1)
- 4.2.3 Ubitwa ngekutsini lomsindvo lodvvetjelwe lapha kulomugca longentasi?
'Emaphepha, emaphepha emabaleni etfu'
Khetsa YINYE imphendvulo.
A Sifanangwaca.
B Sifutamsindvo.
C Sifanankhamisa.
D Silinganisamcondvo. (1)
- 4.2.4 Usho kutsini sonkondlo ngalomusho longentasi? Chaza.
'Sala kutjelwa sibona ngemopho.' (2)
- 4.2.5 Chaza kutsi sonkondlo ucondzeni ngalemigca lengentasi?
Bhala liphuzu LINYE.
'Mnukubeti, Mnukubeti,
Cabanga, ucabangisise,
Zindla uzindlisise' (1)
- 4.2.6 Bhala TIMBILI tikhatsi letitfolakala enkondlweni letikhombisa kutsi umnukubeti abekhutwa angeva. (2)
- 4.2.7 Shano kutsi hlobo luni lwesinongo senkhulumo lesisetjentiswe kulomugca longentasi. Bhekisa imphendvulo yakho kulamagama ladvvetjelwe.
'Usilwane cobo lwaso wena'
Khetsa YINYE imphendvulo.
A Sifaniso
B Sifanisongco
C Selutfo
D Sihabiso (1)
- 4.2.8 Yini lasitjela yona sonkondlo ngalenkondlo lengenhla?
Bhala emaphuzu LAMABILI. (2)
- 4.2.9 Bhala imigca LEMIBILI lesenzimani ye-3 legcamisa kutsi sonkondlo bekacasukile nakabhala lenkondlo. (2)
- 4.2.10 Yini loku sonkondlo lakhuluma ngako kulomugca longentasi?
'Tehle letingeyusulwa ngumuntfu' (1)

- 4.2.11 Bhala tintfo LETIMBILI letinukubeta umoya kulesikhatsi sanyalo. (2)
- 4.2.12 Chaza indlela lehleleke ngayo lemigca yalenkondlo lelandzelako ubhekise emagameni ayo.
- 'Kutsanti bekwekhutwa wen' eMgwenya
Itolo bekwelulekwa wen' evenini yakho yentfutfu.' (2)

SAMBA SESIGABA D: 35
SAMBA SAKO KONKHE: 70